

Starfshópur

vegna frumvarps til laga um samþættingu þjónustu í þágu farsældar barna

Stjórnskipuleg staða

Nefndin heyrir beint undir bæjarstjóra.

Nefndin starfar á velferðarsviði, sem er undir stjórn sviðsstjóra velferðarsviðs. Skóla- og tómstundasvið starfar náið með nefndinni.

Nefndin starfar þvert á svið, en eftirfarandi stofnanir og málaflokkar heyra undir verkswið nefndarinnar: almenn félagsþjónusta, málefni fatlaðra, barnavernd, leikskólar, grunnskólar, framhaldsskólar og tónlistarskólar.

Nefndin er verkefnabundin nefnd sem hefur störf við stofnun nefndarinnar. Störfum nefndarinnar lýkur þegar lokaskýrsla nefndarinnar hefur verið gefin út og tekin fyrir í bæjarstjórn.

Áætlað er að nefndin ljúki störfum fyrir árslok 2021.

Skipan

Í nefndinni eiga sæti ellefu fulltrúar, þar af þrír sem bæjarstjórn kýs, út kjörtímabil nefndarinnar.

Sviðsstjóri velferðarsviðs og sviðsstjóri skóla- og tómstundasviðs eru starfsmenn nefndarinnar.

Þá er heimilt að kalla til á fundi nefndarinnar sérhvern þann er tengist málum er fjallað er um hverju sinni. Starfsmönnum sveitarfélagsins er skylt að sitja fundi nefndarinnar sé þess óskað.

Gert er ráð fyrir að lögin taki gildi þann 1. janúar 2022. Stofnanir og deildir bæjarins skulu vera nefndinni til aðstoðar eftir því sem þörf reynist á vegna upplýsingagjafar og greiningar á þjónustu við börn.

Auk kjörinna fulltrúa bæjarstjórnar tilnefni Heilbrigðisstofnun Vestfjarða tvo fulltrúa, Menntaskólinn á Ísafirði einn og Súðavíkurreppur einn.

Í nefndinni sitja, auk sviðsstjóra, þrír fulltrúar frá velferðarsviði og þrír fulltrúar frá skóla- og tómstundasviði.

Bæjarstjóri á rétt á að sitja fundi nefndarinnar með málfrelsi og tillögurétt. Einnig aðrir áheyrnarfulltrúar sem bæjarstjórn samþykkir.

Bæjarstjórn kýs formann fyrir nefndina, ritari er sviðsstjóri velferðarsviðs.

Hlutverk

Hlutverk nefndarinnar er:

- Stefnunótun þjónustunnar og framkvæmd hennar á grundvelli frumvarps til laga um samþættingu þjónustu í þágu farsældar barna
- Skil skýrslu til bæjarstjórnar þar sem staðan með tilliti til þjónustu við börn er skilgreind.
- Gera tillögu til bæjarstjórnar um með hvaða hætti þjónustunni skuli háttað hjá sveitarfélaginu eftir lagasetningu.
- Vera embættismönnum til ráðgjafar varðandi allt það sem snýr að breytingu og útfærslu þjónustu sveitarfélagsins í kjölfar lagasetningar.

Nefndin skal sækja þá sérfræðiþjónustu sem nauðsynleg er til að uppfylla hlutverk nefndarinnar.

Starfshættir

Um starfshætti nefnda er sérstaklega getið í **IV. og VI. kafla samþykktar um stjórn Ísafjarðarbæjar og fundarsköp bæjarstjórnar** og skal þeim fylgt eftir því sem við á.

Nefndin mun funda a.m.k. einu sinni í viku en oftast ef þörf krefur.

Nefndin skal halda **gerðabók**. Ritari færir fundargerð í gerðabók. Í gerðabók skal getið **hvar og hvenær** fundur er haldinn, töluröð fundar og hverjir sitji hann.

Skrá skal **einstök** mál sem tekin eru fyrir, dagsetningu þeirra, aðila máls og meginefni og hvernig mál er afgreitt. Sé mál ekki afgreitt samhljóða skal greina í fundargerð hvernig atkvæði hafa skipst.

Í lok fundar skal fundargerð **lesin upp og undirrituð** af fundarmönnum. Einnig skal formaður nefndar og einn nefndarmanna setja **upphafsstafi** sína undir hverja blaðsíðu fundargerða, sem blaðsíðusettar skulu í áframhaldandi töluröð.

Heimilt er að skrá fundargerðir í **tölvu**. Sé það gert skal bóka í gerðabók **númer fundar**, hvar og hvenær fundurinn er haldinn og að fundargerð sé færð í tölvu. Þá skal færa í gerðabók fundarslit og greina **blaðsíðutal** fundargerða. Nefndarmenn skulu rita nöfn sín við slit fundar í gerðabók. Fundarmenn fá **afrit** af fundargerð í lok fundar.

Formaður og/eða starfsmaður sér um **boðun funda**. Fundarboðun skal vera skrifleg og tilgreina fundarstað, tíma og dagskrá. Fundarboð skal sent fulltrúum og öðrum sem seturétt hafa á fundum eigi síðar en einum sólarhring fyrir fund.

Formaður **stýrir fundum** nefndarinnar samkvæmt ákvæðum IV. og VI. kafla, sbr. og III. kafla samþykktar um stjórn Ísafjarðarbæjar og fundarsköp bæjarstjórnar.

Fundur telst **ályktunarhæfur** ef meirihluti nefndarinnar er mættur á fundi. Í atkvæðagreiðslu ræður afl atkvæða. Mál telst fallið í atkvæðagreiðslu ef atkvæði falla að jöfnu.

Réttindi og skyldur fulltrúa

Um réttindi og skyldur fulltrúa í nefndinni gilda ákvæði sveitarstjórnarlaga nr. 138/2011 og ákvæði IV. kafla samþykktar um stjórn Ísafjarðarbæjar og fundarsköp bæjarstjórnar, eftir atvikum.

Fulltrúa er skylt að sækja fundi nema lögmæt forföll hamli. Skal hann þá boða staðgengil í sinn stað, sé honum fyrir að fara, og láta formann nefndarinnar og/eða starfsmann vita um forföll með góðum fyrirvara.

Hver fulltrúi á rétt á að koma máli á dagskrá fundar, enda skilar hann efni þess til formanns a.m.k. tveimur sólarhringum fyrir fund.

Fundarmenn skulu hafa hag bæjarins að leiðarljósi við störf sín í nefndinni, en eru ekki bundnir af öðru en sannfæringu sinni, lögum og samþykkt um stjórn Ísafjarðarbæjar og fundarsköp bæjarstjórnar í atkvæðagreiðslu um málefni á vegum nefndarinnar.

Fundarmenn eru bundnir þagnarskyldu vegna mála, sem þeir fá vitneskju um í starfi sínu fyrir nefndina og ætla má að leynt eigi að fara samkvæmt eðli máls eða lögum, hvort heldur sem þau varða einka- eða almannahagsmuni.

Fulltrúi skal víkja af fundi við umræður og afgreiðslu mála, sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Honum er þó heimilt að gera stuttlega grein fyrir afstöðu sinni áður en hann víkur af fundi.

Að öðru leyti gildir um hæfi nefndarmanna ákvæði 20. gr. sveitarstjórnarlaga nr. 138/2011, II. kafla stjórnsýslulaga nr. 37/1993 og 17. gr. bæjarmálasamþykktar Ísafjarðarbæjar.

Nefndarmenn fá greitt fyrir fundarsetu samkvæmt reglum um greiðslur til bæjarfulltrúa og nefndarmanna.

Lög og reglugerðir

Í störfum sínum skal nefndin taka mið af þeim lögum og reglugerðum er snerta starfssvið hennar, s.s. um þjónustu við börn gilda, sérstaklega lög um fatlaða með langvarandi stuðningsþarfir, félagsþjónustu sveitarfélaga, barnavernd, leikskóla, grunnskóla, tónlistarskóla og framhaldsskóla, svo og Barnasáttmála Sameinuðu þjóðanna.

Þá skal nefndin fylgja samþykkt um stjórn Ísafjarðarbæjar og fundarsköp bæjarstjórnar eins og hún er hverju sinni og kynna sér ákvæði sveitarstjórnarlaga nr. 138/2011.

Þannig samþykkt af bæjarstjórn Ísafjarðarbæjar, 24. júní 2021